

---

## COMUNICÂT STAMPE

### CJARTE EUROPEANE DES LENGHIS REGJONÂLS E MINORITARIIS

## BRUXELLES E CRIDE AE ITALIE

### **Tal Parlament european si à fevelât de lenghe furlane La UE: "O sin daûr a tignî di voli lis politicis di tutele"**

Udin, ai 6 di Jugn 2013 - "Daspò vincj agns de adozion de Cjarte europeane des lenghis regionâls o minoritariis la Italie no le à ancjemò ratificade. E je une situazion che il Guvier al à di risolti in curt".

La coincidence jenfri la cridade che e rive di Bruxelles, di bande dal vicepresidente de ong di rapresentance des minorancis te UE, Davyth Hicks, in ocasion de cunvigne "Regional languages in the polices of the European union and its member States" tal Parlament european e lis celebrazions pal vincjesim de Cjarte europeane des lenghis minoritariis al è incindiôs.

Di fat, propit cuant che dapardut si inmanein manifestazions par celebrâ l'aveniment, in Europe si domandin cemût mai che in Italie nol sedi ancjemò ratificât il tratât internazionâl che al è bielzà jentrât in vigôr in 25 Stâts europeans.

A ricuardâlu al è stât propit îr ancje il finlandês poliglot - dîs a son lis lenghis che al fevele - Johan Haggman, coordinadôr dal grup de Comission europeane che si ocupe di multilinguism.

Haggman, che al à fevelât ae cunvigne inmaneade de Regjon polache de Pomeranie in colaborazion cu la Regjon Friûl Vignesie Julie par vie dal ufici di colegament di Bruxelles, al à confermât la grande atenzion pe situazion de lenghe furlane, che, al à garantît, "e ven tignude di voli in maniere costante dal Comissari european pal multilinguism".

In cont di chest, al è stât il diretôr de ARLeF, William Cisilino, a spiegâ in maniere puntuâl il percors normatîf puartât insom de Region Friûl Vignesie Julie a pro de tutele dal furlan.

"La promoziun des minorancis linguistichis - al à rilevât Cisilino - e deventarà simpri plui impuartante te suaze des politicis europeanis dal avignî, tant al è vêr che aromai lis lenghis minoritariis a puedin jentrâ, cu la stesse dignitât di chês altris in ducj i programs di finanziament de UE. Par cheste reson al è strategic instaurâ rapuarts di colaborazion produtîfs cu lis organizacions che a son dongje des istituzions europeanis, tant che il European Language Equality Network (ELEN)".

Propit il vicepresidente di ELEN, Hicks, al à anunciât che la rê e promovarà une domande par rivâ a vê liniis di finanziament di pueste cul fin di pandi l'ûs des lenghis minoritariis e regionâls in Europe e al à ilustrât la propueste di istituzion di un Osservatori su lis politicis di tutele.

In particolâr, al è stât une vore interessant il confront jenfri la situazion de lenghe furlane cun chê casubiane presinte in Pomeranie. La analisi che e à metût a confront la situazion sociolinguistiche e à mostrât une vore di afinitâts.

La normative regionâl di tutele fate buine dal Voivodât - che e à introdusût l'insegnament veicolâr a scuele - e à provocât un grant risultât di sensibilizazion publice in pôc timp: dîs agns za fa i fevelants a jerin 50 mîl, tal ultin censiment dal 2011 a son stâts 200 mîl chei che a si son declarâts cun braure di lenghe casubiane.

*Elisabetta Pozzetto*

Regione autonoma Friuli Venezia Giulia

ARLeF – Agenzie Regionâl pe Lenghe Furlane

0039 0432 555724 mob 0039 335 8002058